

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 भुक्रवार

दिनांक 29.11.2024

प्रमुख समाचार –

- 1- छत्तीसगढ़ लोकसेवा आयोग ह राज्य सेवा परीक्षा दू हजार तेईस के परिणाम जारी कर देहे – बलौदाबाजार के रविशंकर वर्मा ह पाइस पहला स्थान।
- 2- राज्य निर्वाचन आयुक्त अजय सिंह के अध्यक्षता म आज नवा रईपुर म नगर पालिका अउ त्रिस्तरीय पंचायत चुनई के तियारी ल लेके दुरुग संभाग के समीक्षा बइठका होइस।
- 3- शराब घोटाला मामला के आरोपी अनवर डेबर ल हाई कोर्ट ले मिले जमानत ल सुप्रीम कोर्ट ह रद्द कर देहे।

समाचार विस्तार ले

पीएससी-परिणाम

छत्तीसगढ़ लोकसेवा आयोग ह राज्य सेवा परीक्षा दू हजार तेईस के परिणाम जारी कर देहे। बलौदाबाजार के रविशंकर वर्मा ह प्रदेस म पहला स्थान पाय हे। एखरे संग दूसर स्थान म मृणमयी शुक्ला, तीसरा स्थान म आस्था शर्मा, चौथा स्थान म किरण राजपूत अउ नदिनी ह पांचवां स्थान पाय हे।

बतादन कि राज्य सेवा मुख्य परीक्षा ए साल चौबीस ले सत्ताईस जून के बीच आयोजित करे गे रिहीस, जबकि साक्षात्कार अट्टारा ले अट्टाईस नवंबर के बीच होय रिहीस। साक्षात्कार बर कुल सात सौ तीन अभ्यर्थी मन ल चिन्हांकित करे गे रिहीस, जेमा जम्मो इन मन साक्षात्कार म हिस्सा ले रिहीन। लिखित परीक्षा अउ साक्षात्कार म पाय गे अंक के कुल योग के आधार म सात सौ तीन अभ्यर्थी मन के मेरिट सूची जारी करे गेहे।

मुख्यमंत्री विष्णुदेव साय ह सफल अभ्यर्थी मन ल बधई अउ सुभकामना दीन हे। ओमन किहीन कि युवा मन के कंधा उपर छत्तीसगढ़ के विकास के महती जिम्मेदारी हरय। मुख्यमंत्री श्री साय ह उम्मीद जताय हे, कि राज्य सेवा परीक्षा म चयन हुए युवा शासकीय सेवा म आके पूरा ईमानदारी ले जनता के सेवा करही।

अखिल भारतीय सम्मेलन

केंद्रीय गृहमंत्री अमित शाह ह आज भुवनेश्वर म पुलिस महानिदेशक अउ महानिरीक्षक मनके अखिल भारतीय सम्मेलन के उद्घाटन करीन। तीन दिन के ए सम्मेलन म आंतरिक सुरक्षा, साइबर अपराध, माओवादी खतरा, कृत्रिम मेधा अउ ड्रोन हमला जइसे जइसे चुनौती मन उपर बिचार-विमर्स होही। आतंकवाद ले निपटे उपर घलो चर्चा होही। ए दउरान बिसिस्ट सेवा बर राष्ट्रपति पुलिस पदक घलो दे जाही। सम्मेलन म जम्मो राज्य अउ केंद्र शासित प्रदेस मनके पुलिस महानिदेशक अउ सीआरपीएफ एनएससी खुफिया ब्यूरो अउ एसपीजी के प्रमुख भाग लेवत हे। उहें, राष्ट्रीय सुरक्षा सलाहकार अजीत डोभाल अउ गृह मंत्रालय के दूसर वरिष्ठ अधिकारी घलो मौजूद हे।

प्रधानमंत्री नरेंद्र मोदी काली अउ परनदिन सम्मेलन म भाग लेबर आज संज्ञा भुवनेश्वर पहुंचही।

राज्य निर्वाचन आयुक्त-बैठक

राज्य निर्वाचन आयुक्त अजय सिंह के अध्यक्षता में आज नवा रईपुर में नगर पालिका अउ त्रिस्तरीय पंचायत चुनई के तियारी ल लेके दुरुग संभाग के समीक्षा बइठका होइस। बइठका में दुरुग के संभागायुक्त, पुलिस महानिरीक्षक, कलेक्टर अउ पुलिस अधीक्षक अउ उप जिला निर्वाचन अधिकारी सामिल होइन। बइठका में चुनाव के तियारी, सुरक्षा बेवस्था, मतदान केंद्र मनके स्थिति अउ निर्वाचन प्रक्रिया ले जुड़े तियारी मनके समीक्षा करे गीस। बइठका में चुनाव के सुचारू अउ सुरक्षित संचालन ल सुनिश्चित करे बर जरूरी निरदेस दे गीस। बइठका में कलेक्टर अउ पुलिस अधीक्षक मन प्रस्तुतीकरण के माध्यम ले अपन-अपन जिला के निर्वाचन के तियारी के जानकारी दीन।

बतादन कि तीन दिसंबर के रईपुर संभाग अउ चार दिसंबर के जगदलपुर संभाग के वरिष्ठ अधिकारी मनके समीक्षा बइठका होई।

अनवर ढेबर-जमानत याचिका

शराब घोटाला मामला के आरोपी अनवर ढेबर ल हाई कोर्ट ले मिले जमानत ल सुप्रीम कोर्ट ह रद्द कर देहे। बताय जात हे कि जउन मेडिकल रिपोर्ट के आधार में अनवर ढेबर ल जमानत मिले रिहीस, उही गलत साबित होगे हे।

बतादन कि हाईकोर्ट ह किडनी अउ गॉलब्लैडर स्टोन के मेडिकल रिपोर्ट के आधार में जुलाई में अनवर ढेबर ल अंतरिम जमानत दे रिहीस। बताय जात हे अनवर ढेबर के मेडिकल रिपोर्ट बनइया डीकेएस सुपर स्पेशलिटी अस्पताल के के एक झिन गेस्ट्रो सर्जन उपर कड़ा कार्रवाई करे गेहे। गलत मेडिकल रिपोर्ट बनाय के आरोप में राज्य सरकार कोति ले डॉक्टर के खिलाफ एफआईआर घलो दरज करे गेहे।

दीपक बैज-पत्रकारवार्ता

प्रदेस कांग्रेस अध्यक्ष दीपक बैज ह राज्य सरकार उपर किसान मन ले कम धान खरीदे के आरोप लगइन हे। आज रईपुर में एक टिन पत्रकारवार्ता ल संबोधित करत ओमन किहीन कि वर्तमान में सरकार के नीति के सेति धान खरीदी धीमा गति से होवत हे। जेखर ले धान खरीदी के लक्ष्य प्राप्त करना कठिन लगत हे। ओमन अनावरी रिपोर्ट ल गलत बतइन संघरा बारदाना के उपलब्धता समेत टोकन सिस्टम घलो सवाल उठाइन।

माओवादी-आत्मसमर्पण

दंतेवाड़ा जिला में चलाय जाय लोन वर्राटू अभियान ले प्रभावित होके आज एक लाख रुपिया के ईनामी माओवादी ह आत्मसमर्पण करे हे। ए माओवादी ह दंतेवाड़ा रेंज के पुलिस उप महानिरीक्षक कमलोचन कश्यप, सीआरपीएफ के पुलिस महानिरीक्षक राकेश कुमार अउ पुलिस अधीक्षक गौरव राय के आगू आत्मसमर्पण करीन। आत्मसमर्पित माओवादी पूर्वी बस्तर डिवीजन के बयानार एरिया कमेटी जनमिलिशिया कमांडर के पद में सक्रिय रिहीस। ए माओवादी उपर पुलिस पार्टी उपर फायरिंग करे, आईईडी लगाय अउ आगजनी जइसे बड़का घटना में सामिल रहे के आरोप हे। आत्मसमर्पित माओवादी ल राज्य के पुनर्वास नीति के तहत पच्चीस हजार रुपिया के सहायता रासि दे जाही।

जल संरक्षण-कार्यशाला

ब्यूरो ऑफ एनर्जी एफिशेंसी-बीईई डहार ले ऊर्जा अउ जल संरक्षण बर किसान मन म जागरूकता लाय के उद्देश्य ले आज दुरुग जिला के पाहंदा स्थित कृषि विज्ञान केंद्र म कार्यशाला के आयोजन करे गीस। ए कार्यशाला म बिजली अउ जल के जादा दोहन ले पैदा होय ऊर्जा संकट अउ सरलग गिरत जल स्तर के सेति भविष्य म आने वाला कठिनाई अउ निदान उपर चर्चा करे गीस। कार्यशाला म क्रेडा विभाग के जिला प्रभारी रवीन्द्र कुमार देवांगन डहार ले सोलर पंप अउ दूसर सौर संयंत्र के सफल संचालन के जानकारी घलो किसान मन ल दे गीस। मुख्य अतिथि के रूप म वरिष्ठ वैज्ञानिक अउ निदेशक डॉक्टर विजय जैन, कृषि विभाग के उप संचालक संदीप भोई अउ उद्यानिकी विसेसज्ञ कमल नारायण वर्मा ए कार्यशाला म सामिल होइन्। कार्यशाला म आने-आने गांव के लगभग सत्तर झिन किसान मौजूद रिहीन।

बातों-बातों में

सुनइया, मन ल बतादन कि प्रादेशिक समाचार एकांश डहार ले समसामयिक विषय म आधारित साप्ताहिक कार्यक्रम "बातों-बातों-में" म ए बखत धरती आबा जनजातीय ग्राम उत्कर्ष अभियान अउ जनजातीय कल्याण ले जुड़े योजना मन उपर आदिमजाति, अनुसूचित जाति, अन्य पिछड़ा वर्ग, अल्पसंख्यक विभाग के प्रमुख सचिव सोनमणी बोरा ले लेगे भेंटवाता के प्रसारण करे जाही। ए कारीकरम आकाशवाणी केन्द्र रायपुर ले काली तीस नवंबर के बिहनिया साढ़े दस बजे ले प्रसारित होही। एला छत्तीसगढ़ स्थित आकाशवाणी के जम्मो केन्द्र रिले करही।

बैडमिंटन प्रतियोगिता

चौबीसवां छत्तीसगढ़ सीनियर राज्स स्तरीय बॉल बैडमिंटन प्रतियोगिता आज ले भिलाई म सुरु होइस। भिलाई इस्पात संयंत्र बॉल बैडमिंटन क्लब अउ छत्तीसगढ़ बॉल बैडमिंटन संघ के संयुक्त तत्वाधान म राखेगे ए प्रतियोगिता म राज्य के आने-आने जिला मनके छत्तीस टीम हिस्सा लिही। ए प्रतियोगिता एक दिसंबर तक चलही। ए प्रतियोगिता के माध्यम ले महिला अउ पुरुष सीनियर वर्ग के टीम के चयन राष्ट्रीय प्रतियोगिता बर करे जाही। महिला वर्ग के राष्ट्रीय प्रतियोगिता मुंबई म छब्बीस ले उनतीस दिसंबर तक आयोजित होही। उहें, पुरुष वर्ग के प्रतियोगिता के आयोजन फरवरी महिना म कर्नाटक म करे जाही।

मौसम

अउ अब पेस हे मौसम के हाल...

दक्षिण-पश्चिम बंगाल के खाडी म एक ठिन बड़का दाब बने हुए हे, जेखर सेति प्रदेस के दक्षिणी विभाग म नमी के आगमन सरलग जारी हे। एखर प्रभाव ले प्रदेस के न्यूनतम तापमान बाढ़े के संभावना हे। मौसम विभाग के अनुसार बस्तर संभाग के दक्षिणी विभाग म काली तीस नवंबर ले बरसा के दौर चालू होय के संभावना हरय। उहें, मध्य छत्तीसगढ़ म एक दिसंबर ले हल्का बरसा के दौर चालू होही।
